



## Protocol

dalla seduta dil cussegl da vischnaunca,  
venderdis, ils 15 da settember 2017: allas 20.15 – 21.25  
Liug: Casa communal

---

**Presidi:** Christoph Berger

**Actuar:** Paul Duff

**Presents:**

- |                          |  |   |
|--------------------------|--|---|
| a) Cussegl               | Armin Berther<br>Adrian Deflorin<br>Edgar Durschei<br>Mario Flepp<br>Anna Maria Genelin<br>Rita Huonder-Tenner | Wendelin Jacomet<br>Admir Jasarevic<br>Christian Loretz<br>Giusep Lozza<br>Armin Manetsch<br>Helga Probst-Linder<br>Livio Zanetti |
| b) Suprastonza           | Robert Cajacob<br>Clemens Berther<br>Victor Flepp  | Jris Lombris<br>Iso Mazzetta  |
| c) Perstgisas<br>Cussegl | Stefan Columberg   |   |
| d) Hosps                 | negins   |   |

## **Plaid d'avertura entras il president**

«Beinvegni el vitg claustral» aschia tuna ei all'arrivada cul tren a Mustér. Nus havein denton da perschader il hosp el liug da partenza da vegnir tier nus. Cu el sesa el tren ha il hosp gia decidu nua ch'el less ir. Cun la buna purschida dalla carta da hosps va quei era pli tgunsch, schiglioc sedecida el forsa per in'otra destinaziun.

### *Viadi da scola a Mustér*

Ei fa grond plascher, che la scoletta da Flond, Sursaissa ha fatg siu viadi da scola a Mustér. Els seigien vegni a Mustér per mirar la pli grond'attracziun da stad. Els ein ir a Clavaniev per mirar las rodas mulin. Grazia ad in artechel ella "Schweizer Familie" han els legiu da quei. In pign sbagl era egl artechel „Clavaniev, in der Nähe von Sedrun.“

### *Bia uniuns activas*

Grond plascher ha il president dil cussegl da vischnaunca digl engaschi dils giuvens dil club d'unihockey. Els han priu liber ed investau bia temps per porscher als scolars da nossa scola populara in attractiv trenament. Ozildi ston ins motivar ils giuvens da separticipar en uniuns. Uniuns che fan buca quei e van buca cul temps – svaneschan cul temps.

L'uniun da tscheiver ei era gia activa, ina caricatura fa la curella che muossa il president dil cussegl da vischnaunca che va sin patinas ed emprova ora la pli nova attracziun dil CSC. Forsa porschan els in cuors dad ir cun patinas per nos pigns quei ei actualmein aunc buca existent.

Ils apiculturs han fatg ina zun informativa purschida e susteniu „Grischa Bina uf dä Schina“. Grond e pign ha saviu emprender dall'impurtonza ecologica da quei pign animal. La sentupada culs ladins a Mustér ei stada in success, organisada dil Forum intercultural Mustér. Era l'Uniun da costums ha priu part ed ei aviarta per novs commembers.

### *Cefras cotschnas dallas pendicularas*

„Las pendicularas svizras han giu ina buna stad e giu in augment da hosps da 14%.“ Scriva RTR. Per vegnir sisu daco las pendicularas da Mustér han repetidamein cefras cotschnas ha il cussegl dils 6 d'october 2017 buca liug. Ils acziunaris han la pusseivladad dad esser presents alla radunonza generala.

### *Investiziuns*

Ei fa plascher ch'il project dalla surbaghegiada „Via Veglia“ vegn realisau. La visualisaziun da tal anfl'ins sin la pagina dalla vischnaunca, economia, fiera d'immobilias.

### *Investau*

550 milliuns el ressort dil Bürgenstock, 725 milliuns el ressort dad Ursera Ei schabegia nuot a Mustér havein nus legiu en in artechel ils 13 da settember. Ei dat activitads el Hotel Acla da Fontauna havein nus udiu ils 14 da settember. Sperein nus che la secunda novitad constat ed il liug da vacanzas attractiv Disentis/Mustér prosperescha da niev.

### *Bondo*

La disgrazia a Bondo ha mussau co nus muntagnards essan exponi a disgrazias dalla natira. Talas caussas san era schabegiar tier nus. Prevenziun ed ina buna organisaziun da salvament ein impurtontas per saver far frunt a tals schabetgs. Cun Bondo demussein nus nossa solidaritad.

## **Informaziuns**

Naschientschas:

Arjan Bajraktaraj, naschius ils 23 d'ost 2017, fegl dad Eldonita ed Agim Bajraktaraj

Deflorin Leon David, naschius ils 8 da settember 2017, fegl da Daniela ed Adrian Deflorin-Flepp.

## **Tractandas:**

1. Protocol 6-2017/2020
2. Canalisaziun Via Veglia: Damonda da credit (messadi nr. 11- 2017/2020)
3. Revisiun parziala dalla planisaziun locala: Elecziun cumplementara d'in commember ni d'ina commembra dalla cumissiun preparatoria
4. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



**Cussegl da vischnaunca 2017/2020**  
**Protocol no. 7**  
Seduta dils 15 da settember 2017

---

## **1. Protocol**

*Protocol nr. 6-2017/2020*

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau objecziuns las qualas ein vegnidas amplificadas ed aschuntadas el protocol.

**Il protocol vegn approbaus senza midadas.**

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



Cussegl da vischnaunca 2017/2020

Protocol no. 7

Seduta dils 15 da settember 2017

---

## **2. Canalisaziun Via Veglia: Damonda da credit (messadi nr. 11-2017/2020)**

### **Presentaziun:**

Suprastonza:

Gerau Victor Flepp: Per realisar la surbaghegiada ein dus objects vegls vegni spazzai. La surbaghegiada nova cumpeggia pliras parcelas. La vischnaunca ei obligada da dislocar la canalisaziun. Per quellas lavurs ha la suprastonza concediu in credit da frs. 92'000.--. Cun la canalisaziun nova vegn in vegl problem digl areal Via Cons, Via Sogn Gions e Via Veglia sligiaus, cheu dat ei repetidamein stuppadas dalla canalisaziun tier draccas ed urezis. Cun quella sanaziun vegnan era las auas dalla via cantunala tangadas, plinavon ein las lingias dalla Corporaziun d'aua Spina da Vin integradas els scavaments. Las sinergias ein evidentas e fan senn per il project. Per mantener il maletg dalla part dil vitg survegn la via ina cuvrida da sulada da crap ch'ei calculada cun frs. 29'500.--.

Cussegl:

Il messadi muossa ora frs. 225'000.-- per il project, quei che survarga la cumpetenza dil cussegl communal. L'avertura per la surbaghegiada sa era vegnir repartida sin dus projects. Dad ina vart ei la canalisaziun da far da niev, da l'autra vart ei la cuvrida dalla via cun sulada ina novaziun. Quellas duas caussas san ins veser sco dus projects e la suprastonza ha concediu frs. 92'000.-- ed il cussegl communal frs. 133'000.-- per quels.

Suprastonza:

Gerau Victor Flepp: La situaziun pretenda da far tut el medem mument, dislocar lingias existentas e far lingias novas.

Gerau Iso Mazzetta: Dalla vart tecnica settracta ei dad in project. Per mantener la trasparenza ei da remarcar che la suprastonza ha concediu frs. 92'000.-- per la sanaziun dalla canalisaziun. La sinergia d'integrar ellas lavurs sligiazions dalla canalisaziun per il quartier Cons e Via Veglia cun ina cuvrida nova dalla Via Veglia san ins sparter en dus projects. Effectiv decida il cussegl sur d'in credit da frs. 133'000.--. La trasparenza ei necessaria perquei che la summa ei buca el preventiv.

Cussegl:

Ei va per buca surpassar cumpetenzas. Il project va sur duas etappas. Impurtont ei da protocolar ei aschia. La cuvrida dalla via cantunala va buca sur la vischnaunca. La fatschenta cumpeggia dus projects, sparter auas e far la via nova. Aschia duess ins sutametter la damonda. Vegn il problem dalla capacita dalla canalisaziun buca mo dislocaus entochen a Raveras?

Suprastonza:

Gerau Iso Mazzetta: La Via Raveras ei prevedida da refar el preventiv 2018. Quei cumpeggia era da sparter las auas schubras e canalisaziun.

Cussegl:

Cusseglie Wendelin Jacomet fa la proposta da midar la damonda en dus projects sco suonda:

Project 1: Il credit net da frs. 92'000.-- gia concedius dalla suprastanza communal per la dislocaziun dalla canalisaziun tenor plan da quartier Via Veglia.

Project 2: Damonda al cussegl communal da conceder in credit net da frs. 133'000.-- per sanar e cumpletar la canalisaziun el contuorn, la sanaziun e la cumpletaziun dalla canalisaziun el contuorn dalla Via Veglia, Via Sogn Gions e Via Lucmagn. Il cussegl communal accepta senza cuntervuschs la midada dalla damonda.

**Decisiun:**

***Il cussegl communal decida cun 10 encunter 4 vuschs la midada dalla damonda en project 1 e project 2 tenor proposta da cusseglier Wendelin Jacomet.***

***Il cussegl communal decida senza cuntervuschs da dar in credit da frs. 133'000.— per project 2, la sanaziun e la cumpletaziun dalla canalisaziun el contuorn dalla Via Veglia, dalla Via Sogn Gions e dalla Via Lucmagn tenor messadi 11-2017/2020.***

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



### **3. Revisiun parziala dalla planisaziun locala: Elecziun complementara d'in commember ni d'ina commembra dalla cumissiun preparatoria**

#### **Presentaziun:**

Cussegl:

La cumissiun existenta sto vegnir completada muort abdicaziun da cusseglier communal Livio Zanetti. Il biro dil cussegl propona cussegliera communal Helga Probst-Linder.

#### **Decisiun:**

***Il cussegl communal elegia cun 13 vuschs ed in abstenziun cussegliera communal Helga Probst-Linder ella cumissiun preparatoria dalla revisiun parziala dalla planisaziun locala.***

Suprastanza:

President communal Robert Cajacob fa beinvegna a cussegliera Helga Probst-Linder ed engrazia a cusseglier Livio Zanetti per ils survetschs prestai en cumissiun el vargau.

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff



#### 4. Ura da damondas (conform ad art. 44 dil regulativ da fatschentas)

Cussegl:

Egl invit alla radunonza generala dallas Pendicularas Mustér SA ein las elecziuns el cussegl d'administraziun publicadas. Sco representant dalla vischnaunca da Mustér figurescha anteriur president communal Francestg Cajacob sin la gliesta. El vargau era in sez en quei cussegl previus per in commember dalla suprastonza communal. Quei sez duess era actualmein vegnir occupaus d'in commember dalla suprastonza.

Suprastonza:

President communal Robert Cajacob: La suprastonza communal ha discurriu sur da quei fatg cun signur Weber. Dapresent vegn investau fetg bia dallas pendicularas e la vischnaunca ei cumpigliada en quellas surbaghegiadas. Il commember dalla societad Pendicularas Mustér SA sto representar ils basegns dalla societad. Sco commember dalla suprastonza communal san ins vegnir en conflicts cun representar la vischnaunca. Francestg Cajacob ei commember dil cussegl dalla societad sco persuna privata. Aschia eis ei era communicau enviars signur Weber. Tier impurtontas decisiuns dallas pendicularas ei la vischnaunca envidada da separticipar per vegnir informada.

Cussegl:

La perioda d'uffeci dil cumandant da pumpiers va a fin l'auter onn. Ha la suprastonza gia fatg las ponderaziuns per successiun?

Suprastonza:

[Gerau Victor Flepp](#): Igl ei enconuschent che Gion Tenner, il cumandant actual, cala. Sia successiun ei aunc buca decidida.

Cussegl:

Tier tgei istanza ston ins seolver per dumandar ina prolungaziun dalla zona 30 el vitg?

Suprastonza:

[Gerau Iso Mazzetta](#): La damonda sto vegnir inoltradas alla vischnaunca, la decisiun pren il cantun. In impurtont criteri per ina decisiun ei il profil dalla ladezia dalla via.

Cussegl:

Il Center sursilvan d'agricultura ha scret ora la piazza d'ina menadra. La vischnaunca Mustér dat ora per quella piazza frs. 15'000.--. Ei setracta da lavur turistica che quella piazza exequescha ed il deficit dalla vischnaunca crescha. Fa la suprastonza patratgs sur da quei?

Igl ei buca opportun che la vischnaunca da Mustér sto purtar persula buordis finansials per la regiun. La causa ei da discussiunar ella radunonza dils presidents comunals.

Suprastonza:

President communal Robert Cajacob: La piazza exequescha lavur turistica. Quei pertucca la regiun da Trun ensi. La persuna responsabla ha organisau [40 occasiuns](#). Ils frs. 15'000.- - ein buca bia per tonta lavur. Ei va cheu per ina piazza ed il postulat da mantener e crear plazzas oblighescha la suprastonza dad esser activs. La damonda da discussiun ei aunc buca tschentada alla suprastonza.



Communicaziun:

President communal Robert Cajacob: Il project Hotel Acla da Fontauna ei en rocla. Il contact dalla suprastanza communal culs cumpraders ha mussau che lur interess ei gronds. Ils possessurs ein vegni activs ord la raschun dallas activitads che van tier il Center da sport e cultura, tier las Pendicularas Mustér e tier il ressort Andermatt. Sper las 170 stanzas da hotel ein aunc habitaziuns administradas planisadas.

President dil cussegl da vischnaunca: Il proxim cussegl ha liug gievgia, ils 16 da november cun datum da reserva venderdis, ils 17 da november 2017. Tractanda principala - preventiv 2018.

Cussegl da vischnaunca Disentis/Mustér  
Il president: Igl actuar:

Christoph Berger

Paul Duff

Disentis/Mustér, ils 20 da settember 2017